



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

## 22. Kalenderwoche – ab 31. Mai 2009

# Achdung vorm Aldor

Nee, dass is vorbei, das gibbds nisch mähr - isch meene jedzde - de Achdung vor dähm Aldor! Dor Juchendwahn greifd immor mähr um sisch. Wennsde äldor als wie vierzisch-fuffzisch un schon Oba bisd, da bisde schon so guhd wie dod. Da kannsde disch einbuddln lassn. Da will disch keenor mähr. Da kommsde offs Abschdellgleis!

Also, jednfalls in beschdimmde Bereische des Lähbens is das so. Zum Beischbiel offm Arbeitsmargd. Ansdadds dass die Arbeidgähbor deinen reischn Schadz an Erfahrung ausbeudn dun, da dun die disch freisedzn un nemm lieber baar junge Hibfor, die von Dudn un Blasn keene Ahnung hamm - aber das ehm mid Ausdauor un großer Flegsibillidäd!

Ooch jedzde Himmlfahrd widdor... - das is ja dor Vadordaach odor Männordaach! Es gibbd dann am erschn Juni noch dähn Kinnordaach, abor es gibbds keen Obadaach! Mid de Fraun is das ja ähnlich - Fraundaach, Muddordaach - abor wo is dor Omadaach? Achdung vorm Aldor? Ebbe! In annre Gulduhren is das annersch. Da sinn de Aldn die, die das Sachn hamm. Herrschor dor Familje un dor Sibbe. . Bei uns bisde bloß noch e Iborbleibsl.

In schbezielle Bereische isses dann allordings ooch annersch. Zum Beischbiel im Schohgeschäfd. Bei de Roggmusigor! Isch hädde nie gedachd, dass de Buhdies werglich ihr Lied wahrmachn dun, wose damals gesung hamm, dass bis zur Roggorrende rogn wolln. Isch dachde damals, die machn Schbaß! Abor ooch annre - zum Beischbiel des Schdohns! Das die ma noch off dor Biehne rumhubbn dun, wenn isch fasd in dor Rende bin, das häddsch nie gegloobd!

Un es sinn ja nisch bloß de Schdohns. Alle meeschlichsn Rogggrubbn von dazumals - im Osdn un

ooch im Wesdn - hamm e Gammbeegg gemachd un dun sisch was zur Rende dazu vordien. Wenn die off Durneeh gehn, dann sinn de Säle un Schdadions voll! Da kenn die jung Grubbn nisch midhaldn. Die dud ja ooch fasd keenor kenn - solsche jung Hibfor. Nee, die aldn Hibfor sinn de Schdars! In dor Roggmusig!

Odor ooch in dor Bolledigg - da dud das Aldor ooch nisch so die Rolle schbieln. Wobei - irschendwann dud nadihrlich doch de Vorkalgunge eingesdzn. Bei de Roggmusigor dusde das nisch so märgn - die sinn ja sowieso meisdens besoffn odor offm Dribb! Un außordähm dun die ja bloß das Zeusch sing, wasse schon als junge Roggor gesung hamm. Das wolln de Leide ja ooch heern! Neues dun die nisch mähr groß zuschdandebring. Abor se hamm ehm een beriehmdn Nam!

Bei de Bollediggor dusde es dann abor ehm doch schdarg vormissn, wenn die nischd Neues mähr zuschdandebring. Wenn die immor widdor bloß ihre aldn Reedn haldn dun - von vorgesdorn! Immor die aldn Liedor - ei kenn gedd noh Sedisfedgschn! Odor so ähnlich. Un drozdähm derfn die immor widdor bei de Wahl n midmachn! Abor unsoreens darf nischma mähr bei dor Arbeit midmachn, wens dumm komm dud.

**Eduard Sachsenmeyer**